

VENDIM
Nr.1158, datë 13.8.2008

**PËR PËRCAKTIMIN E KUSHTEVE DHE TË PROCEDURAVE, PËR
RIMBURSIMIN E AKCIZËS SË LËNDËVE DJEGËSE, TË KONSUMUARA NË
SERRAT ME NGROHJE, PËR PRODHIMIN E PRODUKTEVE INDUSTRIALE E
AGROINDUSTRIALE, TË CILAT PËRDOREN PËR NEVOJA TEKNOLOGJIKE TË
PRODHIMIT**

Në mbështetje të nenit 100 të Kushtetutës dhe të shkronjës “d” të pikës 2 të nenit 19 të ligjit nr.8976, datë 12.12.2002 “Për akcizat”, të ndryshuar, me propozimin e Ministrit të Financave, të Ministrit të Ekonomisë, Tregtisë dhe Energjetikës dhe të Ministrit të Bujqësisë, Ushqimit dhe Mbrojtjes së Konsumatorit, Këshilli i Ministrave

VENDOSI:

1. Vlera e akcizës së lëndëve djegëse, solar dhe mazut (përveç lëndëve djegëse të përdorura në sektorin e prodhimit të çelikut), të konsumuara në serrat me ngrohje, për prodhimin e produkteve industriale e agroindustriale, të cilat përdoren për nevoja teknologjike të prodhimit të produkteve në këta sektorë, në përputhje me sasinë e produktit final, të shitur me faturë TVSH-je, rimburohet sipas këtyre kushteve:

a) Skema e rimbursimit është proporcionale.

b) Tri vitet e para, rimbursimi bëhet në masën 100 për qind të akcizës së konsumuar për nevoja të prodhimit, në vitin e katërt rimbursimi bëhet në masën 80 për qind dhe në vitin e pestë në masën 50 për qind të kësaj akcize.

1.1. Vlera e akcizës së lëndëve djegëse, solar, mazut, gazoil (dizel), të konsumuara në furrat e bukës, gjatë procesit të pjekjes, në përputhje me sasinë e produktit final, të shitur me faturë TVSH-je, rimburohet.

2. Çdo person juridik, vendas ose i huaj, për lëndët djegëse (solar dhe mazut), të konsumuara në serrat me ngrohje, për të prodhuar produkte industriale (për furrat e bukës - solar, mazut dhe naftë) dhe agroindustriale, të cilat përdoren për nevoja teknologjike të prodhimit të produkteve në këta sektorë, duhet të paraqesin, pranë degëve të tatimeve ku janë regjistruar, kartën teknologjike, ku të shënohen:

a) lloji i lëndës djegëse, të përdorur në procesin teknologjik;

b) fazat në procesin teknologjik, ku përdoret lënda djegëse;

c) lloji i kaldajës apo i furrës, ku përdoret lënda djegëse dhe lidhja me procesin teknologjik, gjatë prodhimit të produktit;

ç) sasia e lëndës djegëse e përdorur për 100 kg (litra ose copë) produkt të gatshëm (final).

3. Subjektet, që kërkojnë rimbursimin e akcizës së lëndëve djegëse (solar dhe mazut), të përdorura në serrat me ngrohje, në proceset teknologjike, për prodhimin e produkteve industriale dhe agroindustriale, të dhënat e përmendura në pikën 2 të këtij vendimi duhet t'i kenë të konfirmuara (certifikuara) nga një institucion i njohur, që ka aftësinë teknike të konfirmimit të kartave teknologjike, si Agjencia Kombëtare e Burimeve Natyrore (AKBN), Instituti i Materialeve të Ndërtimit, Drejtoria e Përgjithshme e Standardeve, Drejtoria e Patentave dhe Markave, institucione, që miratojnë kartat e ndryshme teknologjike, apo çdo institucion tjetër, që ka aftësitë dhe lidhet me proceset teknologjike të produkteve, që

përdorin këto lëndë djegëse.

4. Degët e tatimeve, pas paraqitjes së të dhënave të kërkuara nga çdo person, sipas pikave 2 e 3 të këtij vendimi, si dhe pas paraqitjes së faturave tatimore me TVSH, për shitjet e produktit final, kryejnë rimbursimin e akcizës për lëndën djegëse të përdorur. Vlera e rimbursimit të akcizës, për lëndën djegëse të përdorur, është vlera që del nga sasia faktike e produktit final, të shitur (me faturë tatimore me TVSH), dhe shkalla tatimore, e miratuar sipas shtojcës 1 të ligjit nr.8976, datë 12.12.2002 “Për akcizat”, të ndryshuar. Shtojca 1, që i bashkëlidhet këtij vendimi, shërben si tabelë referuese për normativat e harxhimit të lëndës djegëse, për disa nga industrinë, objekte të këtij vendimi.

5. Rimbursimi i akcizës së lëndëve djegëse, të konsumuara në serrat me ngrohje, për prodhimin e produkteve industriale dhe agroindustriale, të cilat përdoren për nevoja teknologjike të prodhimit të produkteve në këta sektorë, në përputhje me sasinë e produktit final, të shitur me faturë TVSH-je, bëhet nga degët e tatimeve brenda 45 ditëve pas paraqitjes së kërkesës nga personi, që kërkon rimbursim.

6. Ngarkohen Ministri i Bujqësisë, Ushqimit dhe Mbrojtjes së Konsumatorit, Ministri i Ekonomisë, Tregtisë dhe Energjetikës dhe Ministri i Financave të nxjerrin udhëzimet e nevojshme, për përcaktimin e procedurave të rimbursimit të akcizës së lëndëve djegëse, në zbatim të këtij vendimi.

7. Ngarkohen Ministri i Financave, Ministri i Bujqësisë, Ushqimit dhe Mbrojtjes së Konsumatorit, Ministri i Ekonomisë, Tregtisë dhe Energjetikës dhe të gjitha institucionet e përmendura në pikën 3 të këtij vendimi, për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTRI

Sali Berisha

Shtojca 1: Tabela referuese e disa normativave të harxhimit të lëndës djegëse

Agro-industria

Nr.	Aktiviteti	Procesi teknologjik	Sasia e lëndës djegëse litër/1 ton prodhim	
			Mazut	Solar
1.	Përpunim qumështi	Sterilizim pasterizim	26-32	24-29
2.	Prodhim ëmbëlsira	Pjekje	42-53	39-48
3.	Prodhim birre	Sterilizim, pjekje malti	26-32	24-29
4.	Prodhim pije alkoolike	Sterilizim, pjekje	26-32	24-29
5.	Përpunim fruta- perime	Sterilizim, pasterizim	26-32	24-29
6.	Prodhim vaji	Sterilizim	26-32	24-29

Nr.	Aktiviteti	Procesi teknologjik	Sasia e lëndës djegëse litër/1 ton prodhim		
			Gazoil (diezel)	Mazut	Solar
	Prodhim buke	Pjekje	45-50	42-53	39-48

Serrat me ngrohje

Nr.	Aktiviteti	Procesi teknologjik	Sasia e lëndës djegëse litër/1 dynym sipërfaqe	
			Mazut	Solar
	Prodhim perime	Ngrrohje e ambientit në	10 000	10 000

Industria*

Nr.	Aktiviteti	Proceset teknologjike	Sasia e lëndës djegëse për njësi të produktit final
			Solar ose Mazut
1.	Prodhim tullash dhe tjegullash me pjekje termike. etj	Ngrrohje, tharje dhe pjekje të tullave dhe tjegullave	4-kg, solar për një 1 –kv produkt final

*Shënim. Ministria e Ekonomisë, Tregtisë dhe Energjetikës, në bashkëpunim me Ministrinë e Bujqësisë, Ushqimit dhe Mbrojtjes së Konsumatorit, do të bëjë përditësimin e normativave të harxhimit të lëndëve djegëse për të gjithë sektorët e industrisë që përfitojnë nga skema e rimbursimit të akcizës.